



纪念版第二十七书

《古今女将传赞》

李浴日纪念基金会出版

www.leeyuri.org

《古今女将传赞》¹

清-朱孔彰²撰

2022年-李仁缪新录

¹《古今女将传赞》作者朱孔彰有鉴于西方女学大兴，为图振奋我巾帼之力，将上自轩辕下至清代之六十九位好义知兵之女子集为一书，分上下二卷，名为《古今女将传赞》，木刻版于1938年由其子历史学家朱师辙于成都印行。

²朱孔彰（1842—1919）清江苏吴县人，原名孔阳，字仲武，改字仲我，晚自署圣和老人。朱骏声子。光绪八年举人，少入曾国藩军营幕府，留营读书。后襄校江南官书局。能传父业，精经学小学。熟于咸同时军事情况。宣统时掌教安庆存古学堂。有《说文粹》、《中兴将帅别传》等。

《古今女将传赞》

图目

叙 / 3

卷上 / 4

1. 元女 / 手箸战经
2. 冯夫人 / 锦车持节
3. 李秀 / 筑天女城
4. 徐琨母 / 献策伐芦
5. 张茂妻 / 诣阙上书
6. 荀灌 / 乞师救父
7. 刘遐妻 / 单骑救夫
8. 虞潭母 / 助子平贼
9. 朱序母 / 率婢筑城
10. 顾琛母 / 高年临戎
11. 石勒妻 / 拔剑斩贼
12. 苟金龙妻 / 祈雨悬新
13. 杨大眼妻 / 戎装齐锈
14. 洗夫人 / 锦伞膺荣
15. 孙道温妻 / 畚土完城
16. 任城太妃 / 代子守城
17. 邹保英妻 / 乘城共守
18. 古元应妻 / 固守飞狐
19. 平阳公主 / 娘子能军
20. 李商胡母 / 谋杀曹旦
21. 李谨行妻 / 环甲拒寇
22. 木兰女 / 代父戍边
23. 苻登妻 / 弯弓射敌
24. 侯四娘、25. 唐四姑、26. 王二娘 / 歃血赴营

卷下 / 12

27. 李侃妻 / 执爨飧士
28. 崔宁妻 / 散财募士
29. 王若涣妻 / 武威战绩
30. 李克用妻 / 力保太原
31. 寨将夫人 / 大破黄巢

32. 韩夫人 / 亲执桴鼓
33. 周虎母 / 衮具犒军
34. 刘节使女 / 绣旗督陈
35. 一丈青 / 认旗着美
36. 辽太祖后 / 大破室韦
37. 萧后 / 亲御戎车
38. 沙里质 / 拔剑督战
39. 曾氏妇 / 质寨黄牛
40. 阿尔占 / 手碎诈书
41. 晏溥妻 / 戎服勒兵
42. 完颜妻 / 自作一军
43. 宣娘 / 保黄平州
42. 许夫人 / 聚兵山寨
45. 毕韬文 / 輿父尸还
46. 韩贞女 / 改装入伍
47. 瓦氏 / 以蛇为粮
48. 沈云英 / 代父将军
49. 萧如薰妻 / 力拒哮拜
50. 阿曩 / 率部御贼
51. 张铨妻 / 坚守家堡
52. 秦良玉 / 善射能文
53. 吴允诚妻、54. 子管者妻 / 入朝献马
55. 木青妻 / 环甲跃马
56. 刘淑 / 索笔赋诗
57. 夜梅 / 手提尺剑
58. 张铎妻 / 执挺击贼
59. 张国鋹妾 / 手犹抱石
60. 刘夫人 / 登屋射贼
61. 青嘉努妻、62. 纳岱妻、63. 迈图妻 / 三妇忠勇
64. 徐襄毅妻 / 夜袭敌营
65. 林夫人 / 啮指写书
66. 孝烈夫人 / 亲享战士
67. 莫远猷母 / 率子筑堡
68. 李仙姑 / 能避五兵
69. 孙开华媳 / 募军报讎

《古今女将传赞》

叙

吾华近时，竞开女学堂，日本政治亦重女学堂，各国皆尚以为教育之基在此，岂不信然？

中国上古时有女皇氏垂教后世。相传共工与颛顼战争，折天柱绝地维，而女娲有补天之功，时女娲为帝，共工颛顼为诸侯，能平其争，是女娲氏善将将也。至殷周时，骊山之女为戎胥轩妻，生中濞以亲，故归周保西垂，西垂以其故，和睦其人有非常材略。周文王兴于西夷，倚以为重，武王誓师，嘉念其功，置之乱臣十人之列，故孔子曰：“才难，不其然乎！唐虞之际，于斯为盛，有妇人焉，九人而已！”（近儒俞曲园先生有刱建骊山老母祠议，前说本之）

其后骊山女之风染于秦，孔子删《诗》列《秦风》，说者谓《小戎》之篇，妇人女子亦知兵而好义，秦是以强，盖耳所习闻。风气渐开，男女本同，男子读书尚气节则为忠臣为义士，女子读书尚气节则为烈妇为女将，圣贤豪杰巾幗英雄其致一也！苟从教育时先提倡之，则风气所趋，岂独秦风为然乎？

商子云壮女为一军，又阮太冲作《女云台》二卷，记古女子妇人建义旗灭盗事，多至数十百人，然是书已无传，余独感秦风之说，录史传所载，自汉迄清得女将六十九人，列其事实，系以赞词名曰《古今女将传赞》，以遗女学堂，或有裨于教化云。

民国二年（1913年）癸丑仲夏长洲朱孔彰书

《古今女将传赞》

卷上

长洲朱孔彰编述

1. 元女 / 手箸战经

元女箸战经一卷、兵法四卷。（隋书经籍志）

赞曰：明耻教战，雄于丈夫，陋彼孙武，不数穰苴。

2. 冯夫人 / 锦车持节

楚主侍者冯嫫能史书，内习汉事，外习西域诸国事，尝持汉节为公主，使城郭诸国敬信之，号曰冯夫人，为乌孙右大将妻。右大将与乌就屠相爱，都护郑吉使冯夫人说乌就屠使降，乌就屠恐，曰：愿得小号以自处。帝征冯夫人自问状，乃遣谒者送冯夫人锦车，持节诏乌就屠诣长罗侯，赤谷城立楚主子无贵弥为大昆弥，乌就屠为小昆弥，皆赐印绶。（通鉴）

赞曰：锦车持节，克平戎丑，当迈昭君，名传不朽。

3. 李毅女 / 筑天女城

章州刺史李毅之女名秀，父讨夷寇战死，众推秀领州事，同将士固守，拔艸薰鼠而食之，卒破贼，时以秀所筑城为天女城。

（南诏通记）

赞曰：代领州事，李秀英豪，拔艸薰鼠，士饥守牢，一时景仰，天女城高。

4. 徐琨母 / 献策伐芦

富春徐琨随孙策击樊能、于麋等于横江，攻张英于当利口，而船少，欲驻军更求，时琨母在军中，谓琨曰：恐州家多发水军来逆，人则不利矣，如何可驻耶？宜伐芦苇以为泚，佐船渡军。琨具啓策，策即行之，众俱济，遂破英，走笮融、刘繇。（三国志）

赞曰：伐芦为泚，佐船渡兵，帅用其策，遂破张英，徐母有谋，讨虜功成。

5. 张茂妻 / 诣阙上书

吴郡守张茂死，沈充之，难妻陆氏散家财，率茂部曲讨充，败之，诣阙上书为茂谢不克之责，诏曰：茂夫妻忠诚，举门义烈，宜追赠茂太仆。（晋书列女传）

赞曰：夫仇克报，大破沈充，追赠茂官，诏书宠隆。

6. 荀灌 / 乞师救父

灌荀嵩小女也，嵩都督荆州，屯宛为杜曾所围，力弱食尽，欲求援于故吏襄城太守石览，计无所出，女灌时年十三，乃率勇士数人，逾城突围夜出，贼追甚急，灌督将士且战且行，入鲁阳山获免，遂向览乞师，及代为嵩书与中郎将周鲂结为兄弟，鲂即遣子率三千人会览救嵩，贼闻兵至散走。（华阳国志，按晋书列女传以嵩为襄阳太守误）

赞曰：年未当笄，孝勇莫及，突围乞师，救父心急，兵至贼散，功成名立。

7. 刘遐妻 / 单骑救夫

刘遐妻，邵续女也，骁果有父风，遐尝为石季龙所围，妻单将数骑，拔遐于万众之中。后遐卒，其婿将作乱，密焚其军仗，诸将即时定之。（六帖）

赞曰：突围救夫，出万众中，有谋有勇，应惊季龙。

8. 虞潭母 / 助子平贼

虞潭征苏峻，潭母孙氏尽发家童，令随潭助战，贸其所服环珮以为军资。（晋书）

赞曰：五马南渡，虞母名著，助子平贼，功成有誉。

9. 朱序母 / 率婢筑城

梁州刺史朱序母韩氏，秦王苻坚攻襄阳，序固守中城，秦兵攻中城初，韩氏闻秦兵将至，自登城履行西北隅，以为不固，帅百余婢及城中女丁，筑斜城于其内，及秦兵至西北隅果溃，斜城不破。（晋书）

赞曰：亲率女丁，修筑不倾，共颂韩氏，号夫人城。

10. 顾琛母 / 高年临戎

晋琅琊王廞起兵，以己女为贞烈将军，悉以女人为官属，以顾琛母孔氏为军司马，时年已百余，尚能执坚破阵。（荷亭辩论）

赞曰：女子知兵，阴符天授，高年临戎，忠贞得寿。

11. 石勒妻 / 拔剑斩贼

勒后刘氏，侍中刘闰中妹，别部胡人也，勒纳之于胡门，美色有德宠。张裨反于襄城，后拔剑斩之，勒赖后而济。后性敏慧，多干畧，理国之务，佐勒建功业，有吕氏辅汉之风。然严整婉容，性不妒忌，尤过之也。初封上党国夫人。建平元年立为皇后。（十六国春秋）

赞曰：拔剑斩贼，襄城以平，婉容有德，不服仓庚。

12. 苟金龙妻 / 祈雨悬新

梓潼太守苟金龙妻刘氏，平原人也。宣武时，金龙为郡带关城戍主，梁人攻围，金龙病，不堪部分，刘遂理战具，拒敌百余日，分衣减食，同劳逸戍，副高景谋叛，立诛之，众畏威怀德。并在外城为贼据，城绝水，刘氏向天祷祈，俄而雨，刘命出公私布绢县之，绞而取水悉储之，会救至，梁人乃退。宣武嘉之，赏其子爵焉。（北史魏书）

赞曰：拒战十旬，代夫调度，关城以安，天赐甘澍。

12. 苟金龙妻 / 祈雨悬新

杨大眼妻潘氏善骑射，尝自诣军省，大眼至攻战游猎之际，潘氏亦戎装齐镞并驱，及还营同坐幕下，对诸僚佐言笑自得，大眼指谓人曰：此潘将军也。（女世说）

赞曰：攻战游猎，夫妇相从，一时名著，是女英雄。

14. 洗夫人 / 锦伞膺荣

谯国夫人洗氏高梁人也，世为南越首领，部落十余万家。夫人幼贤明，在父母家抚循部众，能行军，用师压服诸越，每劝宗族为善，由是信义结于本乡。梁大同初，罗州刺史冯融闻夫人有志行，为其子高梁太守宝聘以为妻，融本北燕苗裔，至宝数世为守牧，他乡羁旅号令不行，夫人乃诚约本宗，使从百姓礼，每与夫宝参决辞讼，首领有犯法者，虽亲族无所纵。自此政令有序，人莫敢违。后遇侯景反，广州都督兵援台城，高州刺史李迁仕据大皋口，遣召宝，夫人疑其反，止之。数日，迁仕果反，遣主帅杜平入赣石。宝以告，夫人曰：“平虏入赣与官兵相拒，势未得还，迁仕在州，无能为也，宜遣使诈之，云身未敢出，欲遣妇往参。彼必无防虑，我将千余人，步担杂物，唱言输贖，得至栅下，贼必可图。”从之，夫人果击败迁仕，因总兵与长城侯陈霸先会于赣石。还谓宝曰：“陈都督极得众心，必能平贼，君厚资给之！”及宝卒，岭表大乱，夫人怀集百越，数州宴然。陈永定二年，其子仆年九岁，遣帅诸首领朝于丹阳，拜阳春郡守。后广州刺史欧阳纆谋反，召仆至南海，诱与为乱。仆遣使告夫人，夫人曰：“我为忠贞，经今两代，不能惜汝负国。”遂发兵拒境，纆徒溃散。仆以夫人之功，封信都侯，册夫人为高梁郡太夫人，赉绣纛油络，驷马安车一乘，给鼓吹一部，并麾幢旌节，一如刺史之仪。陈亡事隋，遣孙魂帅众迎总管韦洸，洸至广州，表魂为仪同三司，册夫人为宋康郡夫人。未几，番禺人王仲宣反，围恍，进兵屯衡岭。夫人遣孙暄帅师援洸，时暄与逆党陈佛智素相友，故迟留不进。夫人大怒，遣使执孙暄，系州狱；又遣孙盎讨佛智，斩之，进兵至南海，与鹿愿军会，共破仲宣。夫人亲被甲、乘介马、张锦伞、领彀骑，

卫岭南既定，帝拜为高州刺史；仍赦出暄，拜罗州刺史；追赠宝为广州总管，封洗氏谯国夫人，幕府署长史以下官属，给印章，听发部落六州兵马，若有机急，便宜行事。降敕书褒美，赐物五千段，皇后以首饰及宴服一袭赐之，夫人并盛于金篋，并梁陈赐物藏于一库。每岁时大会，皆陈于庭，以示子孙，曰：“汝等宜尽赤心向天子，我事三代主，惟用一好心，今赐物俱存，此忠孝之报。”时番州总管赵讷贪虐，诸俚獠多有亡叛，夫人遣长史张融上封事，论安抚之宜，并言讷罪状，上遣推讷，得其赃，竟致于法。敕委夫人招慰亡叛，夫人亲载诏书，自称使者，历十余州，宣述上意，谕诸俚獠，所至皆降。文帝赐夫人临振县汤沐邑一千五百户。仁寿初卒，谥为诚敬夫人。（隋书、北史女世说）女子善将兵者有保宁洗氏、陈氏。（鸡窗剩言）赞曰：宝全仆免，智勇是饶，貽厥孙谋，上德宣昭，绣幃锦伞，乘马骄骄，勤劳三世，忠于南朝。

15. 孙道温妻 / 畚土完城

道温妻赵氏女也，万俟奴反围岐州，赵氏率城内人众齐备土完城，城竟克全，赠安平县君。（北史）赞曰：畚土完城，全此众生，岐州以定，褒美安平。

16. 任城太妃 / 代子守城

任城国太妃孟氏巨鹿人，尚书令任城王澄之母，澄为扬州刺史，率众出讨梁将姜庆真，袭陷罗城，长史韦纘计无所出，孟乃勒兵登陴，先守要便，激厉文武，安慰新旧，劝以赏罚，将士咸奋，太妃亲巡，城守庆真乃退灵，太后令曰：“鸿功盛美，实宜垂之永年。”乃有勅司树碑旌美。（魏书、庆真说储作庆贞）赞曰：太妃孟氏，代子守城，何以退敌，赏罚严明。

17. 邹保英妻 / 乘城共守

邹保英妻奚氏，万岁通天初，契丹贼李尽忠来寇平州保，英时任刺史，领兵讨击，既而城孤援寡，势将陷，奚氏乃率家童及

城内女丁相助固守。贼退，所司以闻，优制封为诚节夫人。（唐书列女传）

赞曰：家童女丁，率守城阙，佐夫尽忠，无愧诚节。

18. 古元应妻 / 固守飞狐

县令古元应妻高氏能固守飞狐县城，卒免为突厥所陷。下诏曰：“顷属默啜攻城，咸忧陷没，丈夫固守，犹不能坚，妇人怀忠，不惮流矢，由兹感激，危城重安，如不褒升，何以奖劝？古元应妻可封为徇忠县君。”（唐书列女传）

赞曰：高氏县君，惟夫是助，飞狐能守，虜引而去。

19. 平阳公主 / 娘子能军

唐高祖起义，兵女平阳公主夫柴绍欲往，虑不能偕主，曰：“公行矣，我自为计。”遂发家资招亡命，得数百人，诸贼皆来会，乃申法誓众，远近咸附，勒兵七万，威振关中，与绍对置幕府，号娘子军。（南部新书）

赞曰：提兵赴召，夫婿忠勤，对置幕府，娘子能军。

20. 李商胡母 / 谋杀曹旦

李商胡之母霍氏善骑射，自称霍总管，时李世勣结商胡为昆弟，入拜商胡之母，母泣谓世勣曰：“窦氏无道，如何事之？”世勣曰：“母无忧，不过一月当杀之，相与归唐耳”。世勣辞去，母谓商胡曰：“东海公许我共图此贼，事久变生，何必待其来，不如速决。”是夜，召曹旦裨将二十三人，饮之酒，尽杀之，旦盖建德妻兄镇河南者也。（通鉴）

赞曰：窦氏无道，李氏有成，母知速决，不待变生。

21. 李谨行妻 / 环甲拒寇

李谨行妻刘氏在代奴城，靺鞨攻之，刘氏环甲率众守城，贼退封燕郡夫人。（唐书）

赞曰：靺鞨来攻，刘氏能守，贼退城完，崇封礼厚。

22. 木兰女 / 代父戍边

木兰女，梁人也，代父戍边十二年，人不知为女，归赋戍边诗一篇传于世，杜牧题其庙云：弯弓征战作男儿，梦里曾经学画眉，几度思归还把酒，拂云堆上祀明妃。（一统志：木兰隋宋州人姓魏氏，焦氏笔剩曰姓朱氏独异志）

附《木兰诗》（见古诗选或曰木兰作或曰无名氏作）

唧唧复唧唧，木兰当户织。不闻机杼声，唯闻女叹息。
问女何所思，问女何所忆。女亦无所思，女亦无所忆。
昨夜见军帖，可汗大点兵，军书十二卷，卷卷有爷名。
阿爷无大儿，木兰无长兄，愿为市鞍马，从此替爷征。
东市买骏马，西市买鞍鞞，南市买辔头，北市买长鞭。
朝辞爷娘去，暮宿黄河边，不闻爷娘唤女声，但闻黄河流水鸣溅溅。

旦辞黄河去，暮宿黑山头，不闻爷娘唤女声，但闻燕山胡骑鸣啾啾。

万里赴戎机，关山度若飞。朔气传金铎，寒光照铁衣。将军百战死，壮士十年归。

归来见天子，天子坐明堂。策勋十二转，赏赐百千强。可汗问所欲，木兰不要尚书郎，愿借明驼千里足，送儿还故乡。

爷娘闻女来，出郭相扶将；阿姊闻妹来，当户理红妆；小弟闻姊来，磨刀霍霍向猪羊。开我东阁门，坐我西阁床。脱我战时袍，著我旧时裳。当窗理云鬓，对镜帖花黄。出门看火伴，火伴皆惊忙：同行十二年，不知木兰是女郎。

雄兔脚扑朔，雌兔眼迷离；双兔傍地走，安能辨我是雄雌？

赞曰：代父戍边，十有二年，才兼文武，忠孝双全，改装易服，矢志贞坚，帖花有象，风格俨然。

23. 苻登妻 / 弯弓射敌

姚萇袭苻登营，陷之，登后毛氏弯弓跨马，率壮士百与战杀，七百余人，众寡不敌为萇所执，遂被害。（春秋十六国）

赞曰：跨马弯弓，杀贼七百，毛氏义烈，名雷竹帛。

24. 侯四娘、25. 唐四姑、26. 王二娘 / 歃血赴营

卫州女子侯四娘、滑州女子唐四姑、青州女子王二娘当史思明之乱，相与歃血，赴行营讨贼，滑濮节度使许叔冀表其忠，皆补果毅将军。（唐书列女传、冬夜笺记）

赞曰：唐代中兴，果毅斯补，嗟彼淑女，可以御侮。

《古今女将传赞》卷上终

大竹徐永孝校字

《古今女将传赞》

卷下

长洲朱孔彰编述

27. 李侃妻 / 执爨飧士

唐项城令李侃妻杨氏，建中末李希烈袭陈州，侃以城小贼锐，欲弃去。妇曰：“君逃，尚谁与守死职焉可也。”侃曰：“兵少财乏，何以守？”妇曰：“县不守则贼地也，仓厅府库其积也，百姓其战士也，于国家何有？请重赏募死士，几可济。”侃乃召吏民入庭中，约死守。众泣许诺，得数百人，率以乘城，妇身自爨，以享士飧必周。侃中流矢，欲归卧，妇责之曰：“君不乘城，孰为有固，心乎死于外，犹愈于床也。”侃遽登城会贼将，中流矢死，引去而城完，杨氏之力也。（唐书）

赞曰：妇人有志，可胜于夫，强藩跋扈，稔恶噬肤，勉以死守，何思城孤，荣名克保，夫妇与俱。

28. 崔宁妻 / 散财募士

西川节度使崔宁妻任氏，宁入朝，杨子琳袭其城，任氏素骁勇，即出家资十万，募勇士，得千人，设部队，手自麾兵逼子琳，子琳大惧而还朝廷，加旰尚书，赐名宁任氏，封夫人。（旧唐书、通鉴）

赞曰：十万家资，出募勇士，夫既入朝，城惟我恃，手自麾兵，敌人披靡。

29. 王若涣妻 / 武威战绩（衮史引作若兔）

王若涣妻夏氏以战功封武威郡夫人。（唐书）

赞曰：妇人知兵，岂惟内助，颇有战功，武威名著。

30. 李克用妻 / 力保太原

克用妻刘夫人尝随军行，军机多所取益。（北梦琐言）

克用困于上源驿，左右先脱归者，以汴人为变告妻刘氏，刘神色不动，立斩之，阴召大将约束谋保军，以还克用归。欲攻汴，刘氏曰：“当诉之朝廷，若擅举，相攻天下，孰能辨其曲直，乃止。”（容斋五笔）

刘氏尝从征伐，为人明敏多智畧，颇习兵机，常教侍妾骑射以佐。太祖梁遣氏叔琮、康怀英等连岁攻晋，围太原，晋兵屡败太祖，思不知所为，大将军李存信等劝太祖亡入北边收兵，以图再举，太祖然之，入以语夫人，夫人问谁为此谋者，曰：“存信也。”夫人骂曰：“存信代北牧羊儿耳，安足与计成败耶？且公尝笑王行瑜弃邠州，走卒为人禽，今乃自为此乎？昔公亡奔达靼，几不能自脱，赖天下多故，乃得南归。今屡败之兵，散亡无几，一失其守，谁能从公？北边其可至乎？”太祖大悟，乃止。（五代史）

赞曰：能佐唐祖，夫人知几，不徙代北，颇习兵机，卒保太原，灭梁显威。

31. 寨将夫人 / 大破黄巢

寨将夫人虞氏，黄巢破西衡州，虞氏躬被甲胄，率兄弟及乡兵战御，贼遂北，虞氏亦死，乡人为立庙大有灵应，宋嘉定间封显佑夫人。（岭南名胜志）

赞曰：躬被甲胄，大破巢兵，夫人庙祀，虽死犹生。

32. 韩夫人 / 亲执桴鼓

夫人京口妓也，蕲王之后，封梁国夫人。蕲王尝邀兀术于黄天荡，夫人亲执桴鼓，金兵终不得渡。一夕兀术凿河遁去，夫人奏疏，言世忠失机纵敌，乞加罪责，举朝为之动色。（鹤林玉露）金兵至世忠，军已先屯焦山寺，金将李选降受之。兀术遣使通问，约日大战，许之，战将十合，梁夫人桴鼓，金兵终不伊渡，建炎六年世忠授武宁安化军节度使，京东淮东路宣抚处置使，置司楚州。世忠披艸菜，立军府，与士同力役，夫人梁亲织薄为屋。（宋史）

赞曰：亲执桴鼓，遏金渡江，劾夫一疏，天子动容，劳苦从夫，织薄为屋，战士乐随，三军和睦。

33. 周虎母 / 奩具犒军

周虎平江人，倜傥有大将器，身兼文武，能赋诗，工大字。开禧间，守和州，敌骑蔽野，居民官军无以为食，城欲下者屡矣。其母夫人自拔首饰奩具，巡城埤遍，犒军使，尽力一战，命虎同士卒，甘苦与之，俱攻围以出战，士卒感其诚意，遂以血战，敌骑几歼，上守城功归于母，命封和国，赐冠帔云。（朱叶绍公四朝闻见录戊集）

赞曰：奩具犒军，激士以义，血战攻围，遂歼敌骑，和国荣封，锡之冠帔。

34. 刘节使女 / 绣旗督陈

李全袭东平，遇金龙虎上将军盛兵以出，旁有绣旗女将，驰枪突辟，全几不免，精锐丧失大半，女将节使女也。（金史）

赞曰：绣旗荡决，全丧其师，节使之子，英武其姿。

35. 一丈青 / 认旗着美

马皋被诛，闾劲周恤其妻一丈青以为义女，后劲说张用归朝，以一丈青妻之，遂为中军统领，有二认旗在焉，题曰关西真烈女，护国马夫人。（女世说）

赞曰：丈青烈女，中军之帅，有二认旗，标其美懿。

36. 辽太祖后 / 大破室韦

太祖淳钦皇后述律氏，讳平，小字月理朵。太祖行兵御，后尝与谋，太祖渡碛击党项，黄头臭泊二室韦乘虚袭之，后知，勒兵以待，奋击，大破之，名震诸夷，及后平渤海，后与有谋，太祖崩后，称制摄军国事。（玉碯集辽史）

赞曰：辽祖建国，述律佐师，大破室韦，名震诸夷，复摄国事，功迈须眉。

37. 萧后 / 亲御戎车

辽景宗睿知皇后萧氏，讳绰，小字燕，燕宰相思温女，景宗册为后，生圣宗。景宗崩后，摄政族属雄强，边防未靖，后与耶律斜轸、韩德让参决大政，任于越休哥以边事。后明达治道，闻善必从，故群臣咸竭其忠，习知军政，澶渊之役，亲御戎车，指麾三军，赏罚信明，将士用命。圣宗称辽盛主，后教训为多。

（辽史契丹国志）

赞曰：北辽萧后，习于军政，澶渊临戎，士皆用命。

38. 沙里质 / 拔剑督战

沙里质阿邻妻也。天辅六年，黄龙府卒叛时，阿邻从军，沙里质纠男妇五百余人，以毡为甲，以裳为旗。贼至，男夫授甲，妇人鼓噪，自拔剑督战，凡三日，贼去，论功封金源郡夫人。

（金史）

赞曰：阿邻有妇，毡甲裳旗，麾兵败贼，三日为期，黄龙郡固，褒显是宜。

39. 曾氏妇 / 质寨黄牛

曾氏妇晏，汀州宁化人，夫死不嫁。绍定间寇破宁化，将乐令令土豪各为结寨约，以拒贼。晏首助兵给，粮多杀获，贼结集来攻，诸寨不能御，晏独依黄牛山旁，自为寨以居。一日，贼遣人来索妇女金帛，晏悉召其田丁，谕之曰：汝曹衣食我家，贼求妇女意在我汝等，必用命奋击之，不胜杀我，降未晚也。倾赍资犒之，众感奋，使诸婢鸣金作其气，贼复退败，乡邻人挈眷依焉，有不能给者，晏悉以家粮代之，于是聚众日广，与其豪析黄牛山为五寨，选少壮练训之，有急互犄角相援，贼数攻弗克，所活老穉数万计，知剑南州陈鞞金帛奖之，名其寨曰万安。晏悉散给其下，又分五寨人，诏封恭人，赐冠帔，补其子承信郎。（宋史）

赞曰：筑寨拒贼，傍黄牛峦，保全乡里，宜名万安。

40. 阿尔占 / 手碎诈书

阿尔占呼尔哈明安瓜尔佳胡山之妻，夫亡寡居，有众千余。兴定元年，上京行省，太平执其父承充以应，布希万奴阿尔占治废垒，积刍粮，以自守万奴。使招之，不从，乃射承充书，入城得而碎之，曰此诈也。万奴兵急攻之，乃衣男子服与其子富德督战甚力，杀数百人，生擒十余人，乃解去。后复遣将击万奴兵，获其将一人，诏封郡公夫人。（金史）

赞曰：手碎诈书，拒战弯弧，搴旗斩将，大破万奴，厥功甚伟，兴定之初。

41. 晏溥妻 / 戎服勒兵

晏溥妻赵氏，靖康初，身自戎服，率义士与贼力战。（稽史）

赞曰：戎服勒兵，名标女史，敌忾同仇，亦有义士。

42. 完颜妻 / 自作一军

蔡城被围，完颜仲德妻率诸命妇，自作一军，运矢石城下，城中妇女争出继之。（完颜史记）

赞曰：集诸命妇，自作一军，光增翟茀，克著奇勋。

43. 宣娘 / 保黄平州

黄平州宣娘有武略，尝领兵营于黄平，今城北有宣娘垒。（贵州通志）

赞曰：黄平宣娘，武略既美，冯吊高风，尚遗战垒。

44. 许夫人 / 聚兵山寨

许夫人聚兵立山寨甚盛，归周彦荣，甚辟诸山寨。（癸辛集识）

赞曰：夫人聚兵，屯列杉枫，山寨遂盛，板屋遗风。

45. 毕韬文 / 舆父尸还

毕女着，字韬文，父守蓟邱，与流贼战死，尸为贼所虏，着即于是夜率精锐，入攻贼营。既至，贼正饮酒，着乘其不意，奋

勇突前，手刃其渠，與父尸而还，时女年方二十四，一时惊异焉。（别裁集王初桐宦史著歙县人，后嫁崑山王聖开）

赞曰：毕女矢志，不共戴天，夜率精士，攻贼之坚，歼厥渠魁，與父尸还，仁孝且勇，芳徽永传。

46. 韩贞女 / 改装入伍

韩贞女保宁人，元末明玉珍据蜀，贞女虑见掠，伪为男子服，混迹民闲，既而被驱入伍，转战七年，人莫知其处女也。后从明玉珍破云南，还遇其叔父赎归都，始改装而行，同时从军者莫不惊异。洪武四年，嫁为尹氏妇，成都人以韩贞女称。（玉池谈屑）

赞曰：改装入伍，灭滇功成，百夫之特，女子之贞。

47. 瓦氏 / 以蛇为粮

苗州女土官瓦氏，嘉靖十四年，调之征倭，至苏州索有司捕蛇，为军中食，败倭于王江泾。（静志居诗话）

赞曰：以甲为裳，以蛇为粮，奇哉女将，土官之良。

48. 沈云英 / 代父将军

沈至绪女云英弱龄，父教以胡氏春秋。崇祯十五年至绪，守道州，流贼薄城，云英与父拒贼于麻汉驿前，父中流矢死，云英率数女将溃围，夺父尸出。湖广总督奏闻，诏拜云英为游击将军，代父将军守道州，后云英亦战死。（明史）

赞曰：道州共守，亲歿女悲，再战破贼，夺还父尸，孝勇无敌，朝廷嘉之。

49. 萧如薰妻 / 力拒哮拜

参将萧如薰妻杨氏，故尚书兆女也，贤而多智，替夫死守，以拒哮拜之党，日具牛酒犒士，哮拜养子云最骁勇，引兵急攻，如薰伏卒高关，诱贼入，射云死，城获全，如薰擢副总兵，杨氏亦被旌。（刘孟涂奇女传）

赞曰：哮拜来攻，同挫贼锐，夫荣如旌，扬名后世。

50. 阿曩 / 率部御贼

土官陶瓚祖母阿曩，正统间叛寇入境，阿曩率所部御贼，斩馘甚多，境土以安，封太淑人。（景东府志胜）

赞曰：阿曩知兵，孙为土官，率部御贼，边境以安。

51. 张铨妻 / 坚守家堡

张铨妻霍氏，铨尽节辽阳，其子官京师，独霍氏在家。寇至众请避之，曰：“避贼而出，家不保；出而遇贼，身更不保，等死耳，曷死于家！”乃率童仆坚守家堡，贼环攻四昼夜，卒不克而去。其避山谷者，多被淫掠。副使王肇生名其堡曰夫人城，后贼来犯，并击却之，里人多赖以免。（流寇始末）

赞曰：坚守家堡，昼夜能防，哀我夫子，尽节辽阳，忠贞济美，萋萋流芳。

52. 秦良玉 / 善射能文

秦良玉，石柱宣抚使马千乘妻也，千乘死，良玉代领其众，为人饶胆识，善骑射，并通词翰，仪度闲雅而驭下严峻，每行军发令，戎伍肃然，所部号白杆兵，平播州、夔州、水西、援辽、拒张献忠，皆有功。及献忠陷全蜀，良玉慷慨语其众曰：“吾兄弟二人皆死，王事吾以孱，妇蒙国恩二十年，今不幸至此，其以余年，事逆贼哉。”悉召所部，约曰：“有纵贼者，杀无赦！”乃分兵守四境，贼遍召土司，独无敢至石柱者。（明史）秦良玉帅师勤王，召见，赐彩币御制诗旌之日，蜀锦征袍，手制成桃花，马上请长纓，世闲不少奇男子，谁官沙场万里行。

（崇祯遗事）

赞曰：兄弟二人，皆死王事，身受国恩，敢有他志，白杆兵强，忠勲可记。

53. 吴允诚妻、54. 子管者妻 / 入朝献马

蒙古人巴图特穆尔来归，赐姓吴名允诚，领所部居凉州，有三子曰荅兰、曰管者、曰克勤，允诚与二子从军，其妻及管者居凉州。番人诱胁其众，欲叛去，允妻与管者谋召部将，禽其党，诛之。帝喜降敕旌，奖管者，妻亦有智略，尝亲入朝献马，朝廷多其忠。（明史）

永乐八年，敕凉州都督吴允诚妻曰：“比鞑寇以兵胁尔，尔能守节励志，谋执叛者戮之，以妇人而秉丈夫之节。朕甚嘉！”令赐尔彩币十表、粟米百石、钞四千贯，羊百控，用示褒嘉。（弇山堂别集）

赞曰：凉州拒寇，子妇能从，入朝献马，帝嘉其忠。

55. 木青妻 / 环甲跃马

木青妻罗氏，兰州人，夫任土知府。罗氏嫁十年，夫卧病，竭力调治，不起，方凶时，适有蕃寇，慨然曰：“彼以我新遭丧，子在襁褓，无能为耳。”乃环甲跃马，先士卒而出，一鼓克敌，边鄙以宁，事姑尽孝，教子以忠，诰封恭人，年五十一终。（刘孟涂奇女传）

赞曰：恭人环甲，愤不欲生，一战克敌，边鄙以宁。

56. 刘淑 / 索笔赋诗

刘夫人淑，南昌忠烈公铎之女也，能读父书，精晓兵法。归王次谐，谐夭，夫人孀居，逆闯逼京师，闻鼎湖之变，夫人乃散家财，募死士得数百人，并其童仆，悉以司马法部署，指挥成陈，士卒咸用命。然孤军寡援，会滇帅张某适至，谒见夫人，以醉语不逊，夫人怒拔剑将斩之，帅环柱走，一军皆惊，思反兵相攻，咸被甲。夫人曰：“杀一女子，何用甲也。然五步之外，汝不得恃众，索笔赋诗见志。”因慷慨责帅，仗剑指陈大义，诸军闻之，无不变色却立者，帅悔且思，率麾下叩首请罪，夫人曰：“妇言不出闾，吾为国难以至于此，事之不济，天也！将军好为之。”跨马而去。（巢震林史、阙文补）

赞曰：南昌忠烈，有女全贞，怒责滇帅，踊跃用兵，慷慨陈义，一军皆惊。

57. 夜梅 / 手提尺剑

夜梅顺宁人，熨妇，万历间，木邦侵境，兵势甚劲，郡男子与之敌者，皆北。妇手持尺剑，败其党百十骑，自是木邦不敢犯。

（名胜志）

赞曰：木邦强盛，毋敢撓锋，女子奋剑，歼彼群首。

58. 张铎妻 / 执挺击贼

崇祯十四年，贼破汝州城，张铎妻丁氏谓两婢曰：今日必死，曷若先出击贼，杀贼而毙，不失为义烈鬼。于是执挺而前，贼先入者，三悉毙于挺，群贼怒攒刺之。（明史汝州志作张铎妻）

赞曰：丁氏义烈，不负夫张，孰若先出，击贼而亡。

59. 张国鋹妾 / 手犹抱石

杨氏，安定举人张国鋹妾，崇祯十六年，贼贺锦攻城急，国鋹与守者议，丁壮登陴，女子运石，杨先倡，城中女子从之，须臾四城皆徧。及城陷，杨死，谯楼旁。事定，获其尸，两手抱石。（明史）

赞曰：贼锦攻城，助夫拒逆，死谯楼旁，手犹抱石。

60. 刘夫人 / 登屋射贼

夫人周将军遇吉妻，崇祯甲申，李贼犯宁武，公血战七昼夜，夫人登屋而射，发一矢，辄殪一贼，力竭城陷，同死。（邵长蘅诗注，启祯野乘）

赞曰：红颜杀贼，十发十殪，战七昼夜，与夫同逝，可谓双忠，不负思帝。

61. 青嘉努妻、62. 纳岱妻、63. 迈图妻 / 三妇忠勇

天命十年六月，明将毛文龙遣兵三百，夜入耀州城南之莽麦，冲薄官屯，寨方逾墙，我寨兵未及堵御，有青嘉努、纳岱、迈图三人之妻，倚车辕于墙以为梯，青嘉奴妻持利刃，率二妇登梯，奋击三百，人皆惊坠走，守耀州城总兵杨古利率兵追击，尽歼之。上召三妇，奖赉、金帛、牛马赐青嘉努、纳岱妻，备御迈图妻千总职。（王先谦东华录）

赞曰：莽麦冲侧，薄官有屯，三妇忠勇，气若孟贵，距贼三百，颠于寨门，帝皇嘉之，武秩拜尊。

64. 徐襄毅妻 / 夜袭敌营

许夫人奉天铁岭人，镇平将军、一等男徐襄毅公滔都妻，精韬铃，善骑射，襄毅出兵，夫人每自为一队。康熙十三年，吴三桂犯湖南，襄毅援彝陵，夫人驻防江口。十五年，镇将杨来嘉叛，夫人沿江剿贼，屡却之。八月贼猝犯镇署，夫人中礮歿。特旨优卹，予云骑尉世职。次子永年袭夫人，能诗，常赋马上，歌曰：“快马轻刀夜祈营，健儿疾走寂无声，归来金镫齐敲响，不让须眉是此行。”（征始集）

赞曰：夜袭祈营，须眉有愧，临陈赋诗，军中惊异，礮殒芳烈，彤史犹记。

65. 林夫人 / 啮指写书

沈文肃公夫人林氏，文忠公则徐之女。咸丰六年，沈文肃公知广信府粤贼将至，城中本无守兵，百姓皆逃亡，省垣亦无兵救援，夫人曰：与其坐而待亡，孰若乞救于邻省玉山饶总兵，总兵名廷选为林文忠旧部，或以义来援，乃啮指血淋漓，写书一函请救。沈文肃持出府门，见担夫数人入城，赏青钱四千令，健足送玉山。玉山离广信三日程，军装由山河下，水涨则速。血书既发，即令担夫数人，往四乡招募死士数百，与夫人登城览形势，闭城门，共守会，大雨山水发，援兵至而贼已薄城，先是贼有侦探言广信城门洞开，无守备，及见城上旗帜，大惊，杀侦探者饶总兵，屡出兵击却之，夫人执爨享士。半月余，贼

遁走，曾文正公在九江奏文肃夫妇守城之功，后百姓建沈公祠，夫人同祀。（详于咸同以来闻见录）

附：《林夫人书》

将军漳江战绩，啧啧人口，里曲妇孺，莫不知海内有饶公矣，此将军以援师得名于天下者也。此间太守闻吉安失守之信，豫备城守，偕廉侍郎往河口筹饷招募。但为势已迫，招募恐无及；纵仓卒得募而返，驱市人而战之，尤所难也。顷来探报，知昨日贵溪失守，人心惶惶，吏民铺户迁徙一空，署中童仆纷纷告去。死守之义，不足以责此辈，只得听之。氏则倚剑与井为命而已。太守明早归郡，夫妇二人荷国厚恩，不得借手以报，徒死负咎。将军闻之，能无心恻乎？将军以浙军驻玉山，固浙防也。广信为玉山屏蔽，贼得广信，乘胜以抵玉山，孙吴不能为谋，贲育不能为守。衢严一带，恐不可问。全广信即以保玉山，不待智者辨之，浙大吏不能以越境咎将军也。先宫保文忠公奉诏出师，中道斋志，至今以为心痛。今得死此，为厉杀贼，在天之灵，实式凭之。乡间士民不喻其心，以舆来迎，赴封禁山避贼，指剑与井示之，皆泣而去。太守明晨得饷归后，当再专牒奉迓。得拔队确音，当执囊以犒前部。敢对使几拜，为七邑生灵请命。昔睢阳婴城，许远亦以不朽。太守忠肝铁石，固将军所不吝，与同传者也。否则，贺兰之师千秋同恨。惟将军择利而行之。刺血陈书，愿闻明命。

赞曰：佐夫成名，忠至智生，啮血写书，远请救兵，危城克保，庙祀膺荣。

66. 孝烈夫人 / 亲享战士

孝烈夫人者，知江西建昌府何栻之妻也。咸丰年间，奥贼犯郡境，栻先令眷属避远乡后，夫人闻贼将至，愿守城同死。入城月余，亲执爨享士，补缀裳衣，登陴览形势，曰：“粮仗不足，奈何追贼至？”攻急城陷，栻被创晕，绝为练勇舁之，出城复

苏，请大府发兵救援，不数日郡克复，夫人与三女则死于府廨井中矣。朝廷旌奖，谥曰孝烈，许建专祠。（详见咸同以来闻见录）
赞曰：孝烈相夫，金石志坚，城坏身陨，忠节凜然。

67. 莫远猷母 / 率子筑堡

莫远猷母池氏苦节抚子。咸丰五年黔省上江斋匪、八寨苗匪相继窃发，池氏在独山州令子孙筑堡州北路，贼来辄大创去。及庚申岁，粤贼石达开陷州城，池氏率子远猷、孙秋闱与贼巷战死，莫大猷奉母陈奔村落闲亦被焚，大猷远猷皆莫。先生友芝犹子巴陵吴南屏，题先生影山艸堂图诗，有句云：“捍贼杀贼好，犹子、犹子之子并斗死，更有两嫂罹此凶，一门义烈高乡里。”（独山莫子思影山艸堂本末，巴陵吴南屏题诗）

赞曰：母子拼命，忠节凜然，筑堡御贼，战迹可传。

68. 李仙姑 / 能避五兵

李武愍公孟群，从妹名素贞，号仙姑，习击剑多武艺，能辟五兵，在武愍军中常战胜，鄂人惊以为神，后歿于陈。（王壬秋湘军志：陈其元庸闲叁笔记）

赞曰：武愍有妹，能辟五兵，鄂人惊诧，善战知名。

69. 孙开华媳 / 募军报讎

孙武壮公开华，光绪十年，守淡水屡败法兵，为名将。公子幼华，恂恂如书生。二十一年日兵北犯，朝廷割台湾与和，台人不屑让，公子募壮士与日人战，死于三貂岭，妻林氏散家财，招募一军，为夫报仇亦战死。（新闻纸）

赞曰：公子战死，妻率义民，为夫报仇，歿而不泯。

跋

先君少游，曾文正公洙生之门，孰习掌故，清季政教，曰：“衰将、懦兵、弱国，家不竞外侮，日亟慨然思咸，同戮乱将帅之功，撰《中兴将帅别传》正续编三十二卷，欲以激厉戎行，警惕中国，使人知安不忘危，不可一日无武备。”其书早风行于世，清廷亦忧于外患之深，改科举设学校，女学亦于此萌芽。

先君谓强国之本基于阴教，中国旧习女子以和柔婉顺为美，而鲜刚强毅烈之风，不足以应世变维危局，乃掇取正史及百家，集记女子好义知兵、御侮卫国、有奇节者，上自轩辕，下逮清代，都为一编，题曰《古今女将传赞》，欲贻诸女学，以振元女、冯嫫、谯国、平阳、巾帼之遗烈，冀有裨于世教。书成江南编译局员李琪善图画，欲仿明吕坤闺范例，为绘图传各一。目画未半，丁亥革命图稿丧失，民国二年皖都督柏烈武聘先君长国学社，复缀拾旧稿补成之，未几，先君即世。

师辙谨臧遗编，仍思倩名手绘图，荏苒未就，迩岁莅蜀，契友多请梓行，师辙亦以国事益艰，圾乎不可终日，斯编为当世所急需，又思稿本之散佚不复补图，先付剞劂，仍列图目于编耑，以待海内好事君子为之，补绘以弥其阙，馨香祝之矣！

民国廿七年（1938年）元月男师辙谨识